

# Lebih satu juta topeng muka bakal tiba

Pembekal dibenarkan import topeng muka dari luar negara

Oleh NORHASPIDA YATIM

**KUALA TERENGGANU**

**L**ebih satu juta bekalan baharu topeng muka yang diimport dari negara luar dijangka tiba di negara ini dalam masa terdekat.

Timbalan Menteri Perdagangan Dalam Negeri dan Hal Ehwal Pengguna, Datuk Rosol Wahid berkata, perkembangan itu dimaklumkan oleh pembekal utama bahan itu.

“Berdasarkan maklumat awal daripada pembekal, barangan yang diimport dari luar negara itu dijangka akan sampai ke sini (Malaysia) dalam masa terdekat.

“Jumlahnya dianggarkan melebihi satu juta keping,” katanya ketika dihubungi *Sinar Harian* semalam.

Rosol berkata, pembekal dibenarkan untuk mengimport topeng muka dari luar negara selepas mendapati ia

habis akibat penularan wabak koronavirus (Covid-19).

“Sebelum ini hanya lima peratus topeng muka dihadkan untuk pasaran negara dan bakinya terpaksa dieksport kepada negara yang mengeluarkan bahan mentah.

“Hasil perjumpaan dengan pekilang dan pengeluar utama topeng muka pada Selasa lalu, kerajaan mengarahkan mereka menambah antara 20 peratus dan 35 peratus bekalan topeng muka untuk pasaran dalam negara,” katanya.

Dalam pada itu, katanya, pembelian panik menjadi antara punca barangan itu habis di pasaran.

“Sekiranya berlaku peniaga yang menyorok barangan itu sudah tentu berlaku lambakan apabila kerajaan mengumumkan topeng muka adalah barangan kawalan.

“Siasatan dilakukan pegawai dan anggota penguat kuasa Kementerian



**ROSOL**

Perdagangan Dalam Negeri dan Hal Ehwal Pengguna (KPDN-HEP) mendapati pembelian secara panik menyebabkan topeng kehabisan stok,” katanya.

Beliau berkata, keputusan kerajaan menetapkan harga kawalan bagi topeng muka diyakini dapat mengatasi masalah pembelian panik.

“Kini harga topeng muka (tiga lapis) ditetapkan kerajaan adalah RM2 sekeping. Jika ada peniaga yang menjual bahan itu melebihi harga ditetapkan, mereka akan dikenakan tindakan mengikut Seksyen 11, Akta Kawalan Harga dan Anti Pencatutan 2011.

“Peniaga yang didapati bersalah menaikkan harga semua jenis topeng muka boleh dikenakan tindakan denda sehingga RM100,000 atau dipenjara tidak melebihi tiga tahun atau keduanya atau dikompaun sehingga RM50,000,” katanya.